

# RI LOK'OLEJ TZ'IBANIC


Tok ri profeta'i' niqubij achique ri nubij ri Uxlabixel pa cánima, ja ri ch'abel ri' noc c'a ri lok'olej ch'abel richin ri Ajaf (tatz'eta' c'a ri DyC 68:4). Ri Ajaf jantape' rubin pe chique ri ru profeta'i' chi tiqutz'ibaj achique nuk'alajirisaj ri Dios chiquivech ri vinek y ri achique nuben quiq'uin. Quere' c'a xubij rija': "Yin ninbij chique ri achi'a' pa ri relebal k'ij, y pa ri rukajibal k'ij, y chuka' pa ri rajquik'a' k'ij, y pa ri rajxocon k'ij, y chuka' ri ch'uti'k tak ruvach'ulef chupan ri nimalej ya', chi rije' tiqutz'ibaj c'a ri ch'abel ri ninbij chique. Roma can quiq'uin vi ri vuj ri xquetz'ibatej can, yin xtink'et c'a tzij pa quivi' ri e aj ruvach'ulef, chiquijujunal ri vinaki' chiquij c'a ri quibanobal, junan riq'uin ri tz'iban can" (2 Nefi 29:11).

## RI LOK'OLEJ TZ'IBANIC RI E C'O KIQ'UIN VACAMI

Ri Ruk'ataj ri Jesucristo quichin ri Chojlaxela' chupan ri Ruq'uisibel tak K'ij nubij chi e caji' vuj jari' ri lok'olej tz'ibanic. Ri caji' vuj ri' jere': Ri Biblia, Ri Vuj richin ri Mormon, ri Ruxe'el Tijonic y ri C'ulanen Tzij [Doctrinas y Convenios], y ri Jebelilej Abej ri Nim Rajel [Perla de Gran Precio]. Re vuj re' jare' ri e nabey tak vuj richin ri K'ataj. Ri quich'abel ri profeta'i' ri e q'ues vacami jare' ri lok'olej ruch'abel ri Ajaf chuka'.

Ri Biblia ruc'uan ri lok'olej tak tz'ibanic ri niqubij achique ri ruk'alajirisan can ri Ajaf chiquivech ri achi'a'. Ri tz'ibanic ri' nitiquir el chupan ri k'ij tok q'ues ri Adán y napon c'a chupan ri k'ij tok xec'oje' ri apostoli' chuvech re ruvach'ulef. E janíla chi profeta'i' ri xec'oje' pe chuvech re ruvach'ulef. Je rije' ri e tz'ibayon richin ri Biblia.

Ri Biblia ch'aron chupan ca'i' ruvech ramaj. Jari' ri Ojer



Retal Tzij y chuka' ri C'ac'a' Retal Tzij. E q'uiy tak tz'ibanic chupan ri Ojer Retal Tzij niqubij chi xtipe na c'a jun Colonel ri xquerelesaj na el ri vinek chupan ri quimac. Ri C'ac'a' Retal Tzij nutzijoj chike ri ruc'aslen ri Colonel ri' y ri Lok'olej Elesanel ri'. Ja rija' ri Jesucristo. Nutzijoj chuka' chi rija' xupaba' ri ruk'ataj chupan ri k'ij ri'. "Nikanimaj chi ri Biblia, jari' ri ruch'abel ri Dios c'a acuchi utz ruk'axaxic banon chire" (ruvakxak Ruxe' ri Nimanic).

Ri Vuj richin ri Mormon, jari' jun lok'olej tz'ibanic quichin ri vinek ri e c'o pe ojer chupan ri América. Nitiquir el rutzijoxic 2,000 juna' tok manjani talex pe ri Jesucristo y niq'uis rutzijoxic c'a pa 400 juna' chirij pe ri ralaxibal rija'. Ri vuj ri' ruc'uan ri rutz'akatisanic ri utzilej rutzijol richin ri Jesucristo (tatz'eta' c'a ri DyC 20:9 y ri 42:12 y chuka' ri 135:3). Tz'ibatel can richin yerutijoj chi utzil checonojel ri vinek chi Jesucristo ja rija' ri Colonel richin re ruvach'ulef. Ri Vuj richin ri Mormon y chuka' ri Biblia, che ca'i' niqik'alajirisaj pe ri Jesucristo (tatz'eta' c'a ri Ezequiel 37:16-19). Ri Vuj richin ri Mormon nutzijoj ri rupetebal ri Jesucristo chupan ri América tok c'a juba' tic'astej pe rija'.

Ri José Smith xuk'axaj ri Vuj richin ri Mormon pa ri ch'abel rubini'an inglés riq'uin ri rusipanic y ruchuk'a' ri Dios. Quere' c'a xubij ri José Smith: "Ri Vuj richin ri Mormon, jari' ri más rubanic chiquivech conojel ri ch'aka' chic vuj chuveh re ruvach'ulef. Y jari' ri nabey abej richin ri kanimanic. Y jun achin más xtijel apon riq'uin ri Cristo tok nunimaj rutzij ri vuj ri' que chuveh xabachique chic vuj."

Janíla chi profeta'i' ri xquitz'ibaj can ri Vuj richin ri Mormon xquitz'et ri achique nic'ulvachitej vacami chupan re k'ij re'. Romari', rije' xquitz'ibaj achique ri nic'atzin chike roj y man xaxe ta ri nic'atzin chique ri vinek ri e c'o can ojer. Quere' c'a xubij ri profeta ri rubini'an Moroni: "Yich'o iviq'uin achi'el vi ta xa ix c'o vave' viq'uin, stape' xa man ix c'o ta pe. Man riq'uin vi ri', kitzij chi ri Jesucristo ix ruc'utun can chinuvech, y yin vetaman ri nibanala'" (Mormon 8:35).

Ri Ruxe'el Tijonic y ri C'ulanen Tzij ruc'uan ri ruk'alajirisan pe ri Dios chupan re k'ij re'. Chupan ri nabey tanaj richin ri vuj ri', ri Ajaf nubij chike chi banon pe ri vuj ri' richin xqueruchojmirisaj c'a ri vinek richin ri ruca'n rupetebal ri Jesucristo. Quere' c'a xubij:

Can que vi c'are' ri ruch'abel ri Ajaf napon c'a chuchi' re ruvach'ulef, richin queri' conojel ri niquiya' quixiquin, xtica-c'axaj c'a quere':

Tinuc'u' c'a apon ivi', tinuc'u' c'a apon ivi', roma ri xtibe-c'ulvachitej apon, roma c'a ri Ajaf xa ninakajub pe (DyC 1:11-12).

Re vuj re' ruc'uan ri achique ruk'alajirisan pe ri Ajaf pa ruvi' ri Ruk'ataj ri Jesucristo chupan re k'ij re'. Ch'aka' tanaj ri e c'o chupan ri vuj ri' niquik'alajirisaj chikavech achique ri rubaniquil re K'ataj. Niquisol rij ri aj chicajel uchuk'a' y chiquijujunal ri samaj ri e c'o chupan. Ch'aka' chic tanaj yequik'alajirisaj chikavech ri jebellej tak tijonic ri xesachitej el chuvech re ruvach'ulef tok xecom ri apostoli' richin ojer. Queri' c'a rubanon ri tanaj 76 y chuka' ri tanaj 88. Ch'aka' chic tanaj niquisol quij ri tijonic ri e c'o chupan ri Biblia. Queri' rubanon ri tanaj 29 y chuka' ri tanaj 93. Ch'aka' chic tanaj niquic'ut chikavech achique ri xti-c'ulvachitej apon. Que c'ari' rubanon ri tanaj 133. Ri Dios oj rupixaban richin titatijoj c'a ki' chire re vuj re'. Que c'are' xubij: Que'inic'oj c'a re pixa' re', roma can e kitzij vi y e jiquil, y ri lok'olej tak rutzijol y ri sujunic ri e c'o chupan can xquek'ajer vi. (DyC 1:37).

Ri Jebellej Abej ri Nim Rajel ruc'uan ri Vuj richin ri Moisés y chuka' ri Vuj richin ri Abraham. Chuka' ruc'uan ri Rutz'ibanic ri José Smith. Chuka' ruc'uan ri Tz'etonic richin ri

Colotajic quichin ri Caminaki'. Jari' xtz'ibatej can roma ri Joseph F. Smith. Ri Vuj richin ri Moisés e ruc'uan jun ca'i' oxi' tz'etonic y tz'ibanic richin ri Moisés. Jari' xk'alajirisex pe chuvech ri José Smith chupan ri junio y ri diciembre chupan ri juna' 1830. Nusol quij jun, ca'i', oxi' tijonic ri e sachatajinek el chupan ri Biblia. Chuka' nuk'alajirisaj juba' chic pa ruvi' ri rutz'uquic re ruvach'ulef.

Ri Vuj richin ri Abraham xk'axex pan inglés roma ri José Smith. Ri vuj ri' xtz'ibatej ojer can chuvech jun bolon vuj roma ri Abraham. Ri vuj xilitej pe pan Egipto chupan re k'ij re'. Ri vuj ri' yojrutijoj chire ri rutz'uquic re ruvach'ulef, y chuka' chire ri rubaniquil ri Dios, y ri utzilej rutzijol, y ri aj chicajel uchuk'a' ri c'o chuvach'ulef.

Ri rutz'ibanic ri José Smith e ruc'uan c'atzinel tak tijonic chuka'. C'o juba' ri ruk'axanic ri xuben ri José Smith chire ri Biblia pa ruch'abel rija'. C'o chuka' juba' ri *Historia de la Iglesia de Jesucristo de los Santos de los Ultimos Días*. Chuka' c'o ri Ruxe' ri Nimanic y ri Tz'etonic richin ri Nabey Ajavaren.

Ri Tz'etonic richin ri Colotajic quichin ri Caminaki', jari' jun tz'etonic ri xk'alajirisex chuvech ri Joseph F. Smith. Jari' xc'ulvachitej chupan ri k'ij 3 richin ri octubre chupan ri juna' 1918. Ri tz'etonic ri' nuk'alajirisaj ri rupetebal ri Jesucristo chupan ri quic'ojobal ri uxlabela'. Chuka' nutzijoj achique rubeyal richin xquecolotej ri caminaki'.

## **RI QUICH'ABEL RI PROFETA'I' RI E Q'UES VACAMI**

Man xaxe ta ri nabey caji' vuj yekanimaj. Xa chuka' nikanimaj chi ri niquibij ri profeta'i' ri e q'ues vacami jari' ri lok'olej ruch'abel ri Dios chuka'. Ri quich'abel rije' yepe c'a kiquin chupan ri nimalej tak molojri'il, y chuka' chupan ri tak vuj ri yeruben ri K'ataj vacami. Chuka' ri profeta nitzijon quiquin ri yukenela' chupan ri K'ataj. "Nikanimaj ronojel ri ruk'alajirisan pe ri Dios, ronojel ri najin chuk'alajirixaxic, y nikanimaj chi Rija' c'a xqueruk'alajirisaj na pe ch'aka' chic janila nima'k y c'atzinel tak rutzijol richin ri rajavaren Rija'" (ri rubelej Ruxe' ri Nimanic).

Tasiq'uij c'a ruvech ri DyC 68:4.

¿Achique camí ri lok'olej ruch'abel ri Dios?

¿Achique ri nabey caji' vuj chupan ri K'ataj?

Tac'utuj c'a chique ri vinek chi tiqubij c'a pe achique quibaniquil ri nabey caji' vuj richin ri K'ataj y achique modo tok xkac'ul.

Tac'utuj c'a chire jun vinek chi tusiq'uij c'a ruvech ri rubelej Ruxe' ri Nimanic.

Tac'utu' c'a chiquivech jun vuj ri banon roma ri K'ataj vacami. (Jari' Liahona o jun chic.)

Tac'utuj c'a chire jun vinek chi tusiq'uij ruvech ri ruch'abel ri c'aslic profeta ri tz'ibatel can chupan ri vuj ri'.

## NIKATIJOJ KI' CHIQUE RI LOK'OLEJ TZ'IBANIC

Nic'atzin chi nikatijoj ki' chique ri lok'olej tz'ibanic ronojel k'ij. Nic'atzin chuka' chi yekatijoj ri kalk'ual riq'uin ri tijonic ri c'o chupan. Utz yekaya' can ri kavuj chupan jun c'ojlil-bel acuchi niquitz'et vi ri kalk'ual. Richin queri' c'o modo niquicusaj y niquetamaj ri rutijonic ri Dios chuka'.

Vi nikarayij nikaxutuj ri itzel, c'o c'a chi nikilij ri kanojibal quiq'uin ri kitzij tak tijonic y ri ruchojmilal ri e c'o chupan ri lok'olej tz'ibanic. Xkojjel na apon riq'uin ri Dios y más xtikajo' ki' vi nikasiq'uij ruvech ri lok'olej tz'ibanic y nika-ch'ob rij.

Tok nikasiq'uij ruvech ri lok'olej tz'ibanic, utz nikach'ob rij y nikac'utuj chire ri Dios pa quivi'. Tok queri' nikaben, ri Uxlabixel xtuk'alajirisaj na pa kánima chi can e kitzij vi ri lok'olej tz'ibanic. Can roj xtiketamaj chi e kitzij ri tz'ibanic ri'. Man xkojsachatej ta (tatz'eta' c'a ri José Smith 1:37). C'o c'a modo chi nikana' achi'el ri xuna' ri Nefi tok quere' xubij: "Ri vánima niquicot quiq'uin ri runa'oj y ri rubanobal ri Ajaf. Jutakel ninch'ob rij pa vánima ri nutz'eton y ri va-c'axan" (2 Nefi 4:16).

Tak'ijuj c'a jampe' xtatijoj na avi' chire ri lok'olej tak tz'ibanic. Tak'ijuj achique hora xtabanala', acuchi, y achique tz'ibanic xtanic'oj. C'ari' tatz'ibaj richin naben. Utz naben ayon oc o quiq'uin ri ch'aka' chic vinek chuka'.

Tabixaj ri bix rubini'an "Ri Xaxilej tak Ch'ich'."

### CH'AKA' CHIC MOCAJ RI UTZ YE'ANIC'OJ

1 Nefi 19:1-3 y ri 1 Nefi 14:20-26 (e pixaban ri profeta'i' richin yetz'iban)

1 Nefi 19:1-3, 6-7 y ri Ajma 37:1-8 (Janila nim rejkalen ri lok'olej tz'ibanic)

2 Nefi 33:10 (ri lok'olej tz'ibanic niquik'alajirisaj ri Cristo)

Alma 29:8 (ri Ajaf nich'o quiq'uin checonojel ri tinamit quiq'uin ri lok'olej tz'ibanic)

2 Timoteo 3:16-17 y ri 1 Nefi 19:21-24 (achique rubaniquil ri ruya'ic pe ri lok'olej tz'ibanic y achique roma tok e ya'on pe)

2 Pedro 1:20 y ri Alma 13:20 y chuka' ri DyC 10:62 (ri lok'olej tz'ibanic yalan k'alaj ri nich'o)

DyC 128:18 y ri 1 Nefi 14:25-26 (c'a c'o na más lok'olej tz'ibanic ri c'a xquepe na)

2 Nefi 29:3-10 (ri lok'olej tz'ibanic xque'apon quiq'uin ri e aj Judá y chuka' quiq'uin ri Gentili')

# RI RUC'ASLEN RI CRISTO

Conojel ri vinaki' ri e petenek chuvech re ruvach'ulef, ni-c'atzin c'a chique ri samaj ri xusuj can ri Jesucristo tok c'a c'o na chila' chicaj. Rija' xubij chi xtoc ri Kacolonel. Vi manek ta jun Colonel, ri chojmilal richin ri runojibal ri Dios man ta xk'ajer. Can nic'atzin vi ri samaj ri xuben ri Jesús. Romari' tok conojel ri profeta'i' ri e c'o tok manjani tipe ri Cristo xquibij chi rija' c'o chi xtipe (tatz'eta' c'a ri Xquibana-  
nala' ri Apostoli' 10:43). Conojel ri profeta'i' ri e c'o pe chirij ri Jesucristo quijiquiban chi rija' can xpe vi. Nic'atzin c'a chi roj chikajujunal nikatijoj ki' chirij ri ruc'aslen ri Ajaf. Nic'atzin chuka' chi nikatij kak'ij richin yekatakej ri rupixa' chijun ri kac'aslen richin queri' xkojjel apon riq'uin rija'.

## **RI RUC'ASLEN RI CRISTO XTZIJOX CAN TOK C'A MANJANI TALEX PE RIJA'**

Jun ángel xubij chire ri Adán chi ri Colonel xtubini'aj Jesucristo (tatz'eta' c'a ri Moisés 6:51-52). Ri Enoc xutz'et can chi ri Jesucristo xticom c'a chuvech jun cruz y xti-c'astej chic pe (tatz'eta' c'a ri Moisés 7:55-56). Ri Noé y chuka' ri Moisés xquik'alajirisaj can ri Cristo (tatz'eta' c'a ri Moisés 8:23-24). 800 juna' tok manjani talex pe ri Colonel, ri Isaías xutz'et ri ruc'aslen. Ri Isaías xutz'et chi janíla xtutij pokon ri Colonel richin xquerutoj ri kamac. Jari' tok quere' xubij: Rija' etzelan coma ri vinaki' y rije' xquixutuj el rija'. Rija' jun achin richin bis, y can retaman ruvech ri k'axo'n. . . .Rija' rejkan ri kak'axomal y ruc'uan el ri kabis . . . .rija' xsocotej roma roj kak'ajon ri pixa', chuka' rija' xch'ay roma ri ketzela. . . .rija' xpalibex y c'o chi xuc'ovisaj c'ayeval. Man riq'uin vi ri', rija' man xujek ta ruchi'. Xc'amer c'a pe achi'el jun alaj carne'l ri nic'amer pe pa camisabel'' (Isaías 53:3-7).

Ri Nefi chuka' xutz'et ri ralaxic ri Colonel. Chuka' xutz'et achique ri samaj ri xtuben ri Ajaf. Xutz'et jun jebelilej k'opoj. Jari' tok jun ángel quere' xubij chire: Tatzu', re k'opoj re natz'et, ja rija' ri rute' ri Ruc'ajol ri Dios, riq'uin ri ch'aculaj (1 Nefi 11:18). C'a c'ari', rija' xutz'et ri k'opoj chi ruch'elen jun ral pa ruk'a'. Ri ángel quere' xubij chire ri Nefi: Tatzu' ri Ruc'ajol ri Dios. Ja rija' ri Ruc'ajol ri Jumul Tata'ixel! (1 Nefi 11:21). 124 juna' tok manjani talex pe ri Jesús, ri Benjamín chuka' xutz'et ri ruc'aslen ri Colonel. Rija' jun profeta y jun rutata'al ri tinamit. Quere' c'a xubij:

“Roma can kitzij vi chi petenek ri k'ij y xa juba' chic apon tok ri Ajaf Ronojel Tiquirel xtika' pe pa ri caj riq'uin ri ruchuk'a' chiquicojol ri calc'ual ri achi'a' vave' chuveh re ruvach'ulef. Ja rija' ri nik'aton tzij, y ri xc'oje' jantape', y xtic'oje' chuka' benek ruveh. Rija' xtic'oje' c'a chuveh re ruvach'ulef riq'uin jun ruch'acul richin ch'abek ulef, y xtibe c'a chiquicojol ri vinaki', y xqueruben nimalej tak samaj. Xqueruch'ajch'ojirisaj ri yava'i' y xqueruyec pe ri caminaki'. Xtuben chi ri e jetz' xquebiyin, y chi ri e moy xquetzu'un, y chi ri e t'oj xque'ac'axan. Xquerak'omaj c'a ronojel ruveh yabil.

“Chuka' xquerelesaj el ri aj tzayi', o pa jun chic ch'abel, ri itzel tak uxlabel ri yec'oje' pa ri cánima ri vinaki' e aj re ruvach'ulef.

“Rija' xtutij k'axomal richin ri ch'aculaj, y chuka' xtitojtobex, y xtinum, y xtichaker ri ruchi', y xticos. Ronojel c'ari' man nitiquir ta nucoch' jun vinek, xa nicom. Can kitzij vi c'a chi ri ruqui'uel xtel pe chupan chijun ri rutz'okpinbel ri ruch'acul. Ri' xtibanatej xa roma can janila vi xtik'axon ri ránima coma ri quimac y ri itzel banobel quichin ri ruvinak.


“Rija' xtubini'aj Jesucristo, ri Ruc'ajol ri Dios, ri Tata'ixel richin ri caj y ri ruvach'ulef y ri Tz'ucunel richin ronojel, c'a pa tok rutiquiribel pe. Ri rute' rija' xtubini'aj María” (Mosia 3:5-8).

Tasiq'uij c'a ruveh ri Timoteo 2:6.

¿Achique roma nic'atzin chi ri vinek ri e c'o can tok manjani talex pe ri Cristo quetaman achique rija'?

## **JA RIJA' RI JUNAYON RUC'AJOL RI TATA'IXEL**

Nitzijox ri ralaxic ri Colonel chupan ri C'ac'a' Retal Tzij.



Jari' nitzijox chupan ri Mateo, ri Marcos, ri Lucas, y ri Juan. Roma ri tzijonic ri', ketaman chi ri Jesús xalex pe riq'uin jun k'opoj rubini'an María. Ri María xa juba' chic man nic'ule' riq'uin ri José. Jari' tok ri ángel xubij chire ri María chi rija' xtoc na ri rute' ri Ruc'ajol ri Dios. Ri María xuc'utuj c'a chire ri ángel achique cami rubeyal richin xti-banatej na c'a queri' (tatz'eta' c'a ri Lucas 1:34). Ri ángel xubij c'a pe quere' chire ri María: "Ja ri Uxlabixel xtipe pan avi' y ri ruchuk'a' ri Dios chicajel xcarumujaj. Roma c'ari' ri lok'olej ac'ual ri xtalex xtubini'aj Ruc'ajol ri Dios" (Lucas 1:35). Que c'ari', ri Dios ri Tata'ixel can ja vi rija' ri rutata' ri Jesucristo. Ri rute' ri Jesús, ja rija' camel, y ri rutata' rija', xa man camel ta. Can xaxe vi rija' queri' rubanon. Romari' tok ja rija' ri Junayon Ruc'ajol ri Dios. Xrichinaj pe lok'olej ruchuk'a' riq'uin ri rutata'. Manjun achin nitiquir ta nucamisaj rija', xaxe vi ta rija' queri' nurayij. Rija' c'o c'a ruchuk'a' richin nuya' can ri ruc'aslen y chuka' richin nuc'asba' chic ri' tok caminek chic (tatz'eta' c'a ri Juan 10:17-18). Xrichinaj pe riq'uin ri rute' achique ri aj ruvach'ulef. Romari' rija' xnum, xcos, xchaker ruchi', xutij k'axo'n, y xtiquir xcom. Jari' roma rija' camel achi'el c'a ri rute'.

Tasiq'uij c'a ruvech ri Lucas 1:34-35.

¿Achique roma nikabij chi ri Jesús ja rija' ri Junayon Ruc'ajol ri Tata'ixel?


¿Achique xrichinaj pe ri Jesús riq'uin ri rutata'?

¿Achique xrichinaj pe riq'uin ri rute'?

## **CAN CH'AJCH'OJ Y TZ'AKET RI RUC'ASLEN RI JESUCRISTO**

Ri Jesús jantape' xuben ri xurajij ri Chicajel Katata' chi xuben. Rija' xq'uiy achi'el ri ch'aka' chic ac'uala'. Xrajo' ri kitzij y ronojel mul xunimaj tzij. Quere' c'a xubij ri Lucas: "Y ri ac'ual niq'uiy, y ninimer ruchuk'a', nojinek riq'uin na'oj. Y ri rutzil ri Dios c'o vi pa ruvi' rija'" (Lucas 2:40).

Tok c'ari' cablajuj rujuna', ri Jesús retaman chic chi rija' takon pe chubanic ri achique nurayij ri rutata'. Rija' xbe pa Jerusalem quiq'uin ri rute' rutata'. Rije' yetajin che tzolinen pa quitinamit tok xquinabej chi rija' man c'o ta quiq'uin. Xebe chic pa Jerusalem chucanoxic. "Y xc'ulvachitej, chi pa rox k'ij, xquil chupan ri rachoch Dios, tz'uyul pa quinic'ajal ri e tijonel, yerac'axaj y nuc'utula' chique. Y conojel ri ye'ac'axan richin, po'inek quic'u'x che ri runa'oj



y che ri c'ulubabel ri yeruya'" (Lucas 2:46-47). Ri José y ri María xequicot tok xquil rija' pero itzel quina'on roma man benek ta quiq'uin rije'. "Val, ¿achique roma xaben quere' chike? Tatzu', ri atata' [ri José] y yin yatkacandola' riq'uin k'axomal." Ri Jesús xch'o apon chi utzil riq'uin ri rute' y xubij chire chi ri José xa ri ruca'n rutata' rija'. Quere' c'a xubij chire ri María: "¿La man ivetaman ta chi c'o chi yic'oje' vi pa rusamaj ri [Chicajel] Nata'?" (Lucas 2:48-49). Ri Jesús c'o chi nuben ri rurayibal ri rutata' c'o chicaj, richin queri' nuben ri rusamaj. Que c'are' xubij can: "Manjun ninben pa nuyonil, xa achi'el xirutijoj ri Tata'ixel, jare' nintzijoj. . . .ninbanala' ri achique nika' chuvech rija'" (Juan 8:28-29).

Tok ri Jesús 30 rujuna', xapon c'a riq'uin jun rach'alal. Ri jun rach'alal ri' rubini'an Juan. Ri Jesús nurayij nikasex chuxe' ya' roma ri Juan chupan ri raken ya' rubini'an Jordan. (tatz'eta' c'a ri Mateo 3:13-17). Ri Juan man can ta xurayij xukasaj ri Jesús chuxe' ri ya' roma retaman chi manek rumac. Ri Jesús xuc'utuj chire ri Juan chi tukasaj na chuxe' ri ya' richin queri' xtik'ajer na chironojel ri ruchojmilal. C'a c'ari' ri Juan can xukasaj ri Jesús chuxe' ri ya'. Tok ri Jesús xkasex yan chuxe' ri ya', ri Tata'ixel xch'o pe chicaj y quere' xubij: "Jare' ri Nuc'ajol yalan nulok'ok'en, ri achojroma yiquicot." C'a c'ari', ri Uxlabixel xkaka pe. Xk'alajirisex riq'uin ri retal jun paloma.

Tok c'a juba' tikasex ri Jesús chuxe' ri ya', ri Satanás xpe chutojtobexic. Ri Satanás nrajo' chi ri Jesús man nitiquir ta nuben ri rusamaj. Vi ta ri Satanás xuben chire ri Jesús chi xuben jun mac, c'ari' man ta chic ruc'amon ri Jesús richin noc ri Kacolonel. Que ta c'ari', xyojtej ta ri rubeyal ri Ajaf. Y xuben ta ri Satanás chi roj xkatij ta pokonal achi'el ri nutij rija'. Man ta xya'ox kak'ij richin yojtzolin ta chic riq'uin ri Tata'ixel. Ri Satanás xutojtobej ri Jesús tok ri Jesús mevayinek chic cavinek k'ij. Tok ri Satanás xutojtobej ri Jesús, ri Jesús xuxutuj ronojel ri xuben y xubij chire chi tel c'a el riq'uin. Tok ri Satanás elenek yan el, ri ángeles xe'apon riq'uin ri Jesús y xquiben lok'olej samaj pa ruvi' (tatz'eta' c'a ri Mateo 4:1-11).

## RI JESUS XOJRUTIJOJ RI ACHIQUE MODO NIKAJO' KI' Y NIKATOLA' KI'

Tok ri Jesús xtojtohex roma ri Satanás, rija' xuchop rubanic ri lok'olej rusamaj chiquicojol ri vinek. Rija' xpe chuvech re ruvach'ulef man xaxe ta che camic koma roj, xa chuka' chikatijoxic che ri utzilej c'aslen. Xojrutijoj chique ca'i' nimalej tak rupixa'. Ri nabey rupixa' richin nikajo' ri Dios riq'uin ronojel ri kac'u'x, ri kanojibal, y ri kuchuk'a'. Ri ruca'n rupixa' richin yekajo' ri ch'aka' chic vinaki' achi-el ri nikajo' ka ki' roj (tatz'eta' c'a ri Mateo 22:36-39). Ri ruc'aslen ri Jesús nuk'alajirisaj chikavech ri rubeyal richin yekatakej re ca'i' pixa' re'. Vi nikajo' ri Dios, xtikacukuba' kac'u'x riq'uin rija' y xtkanimaj rutzij. Ri Jesús xunimaj ronojel rutzij ri Dios. Vi roj yekajo' ri ch'aka' chic vinaki' yekato' riq'uin ri achique nic'atzin chire ri quich'acul y chuka' chire ri qui espíritu.

Ri Jesús xerusamajij ri ch'aka' chic vinek chijun ruc'aslen. Xuc'achojirisaj ri quiyabil. Xuben chi ri e moy xetzu'un. Xuben chi ri e t'oj xe'ac'axan. Y xuben chuka' chi ri e jetz' xebiyin. Jun k'ij rija' najin chiquic'achojirisaxic ri yava'i'. Xka' c'a ri k'ij y ri vinek xenum. Pero, rija' man xerutek ta el, xa xeruchop vo'o' caxlan vey y ca'i' quer y xeruturusaj. Xbanatej jun nimalej samaj. Riq'uin ri caxlan vey ri' y ri quer, rija' xrilij jun molaj vinek janíla chi nim. E c'o c'a 5,000 vinek chiri' (tatz'eta' c'a ri Mateo 14:14-21). Ri Jesús xojrutijoj chi tok nikac'ul ki' riq'uin jun chic vinek ri ninum, o nibison, o ch'anay, o nuna' tef, nic'atzin c'a chi nikato'. Tok nikato' jun chic vinek, ja ri Colonel ri nikato' (tatz'eta' c'a ri Mateo 25:35-46).

Ri Jesús xerajo' ri ch'aka' chic vinaki' riq'uin ronojel ri ruc'u'x. C'o bey tok xnoj ri ránima riq'uin joyovabel y xok'. Rija' xerajo' ri ac'uala', y ri rijitek tak vinaki', y ri vinaki' ri ch'uch'uj ri cánima, y cukul quic'u'x riq'uin rija'. Rija' xerajo' ri vinaki' ri e aj mac. Xujoyovaj quivech y xerutijoj chi nic'atzin chi nitzolin pe quic'u'x y xekasex chuxe' ya'. Quere' c'a xubij: "Yin ri bey, yin ri kitzij, y yin ri c'aslen" (Juan 14:6). Rija' chuka' xerajo' ri vinaki' ri xemacun chirij rija' y man xtzolin ta pe quic'u'x. Pa ruq'uisibel ri ruc'aslen, tok jequel rija' chuvech ri cruz, xuc'utuj ak'anij chire ri Tata'ixel coma ri achi'a' ri e camisayon richin. Quere'

xubij: "Nata', tacuyu' quimac, roma man quetaman ta ri niquben" (Lucas 23:34). Chuka' quere' xubij: "Jare' ri nupixa', chi tivajovala' ivi', achi'el yin ix vajovan" (Juan 15:12).

Tasiq'uij c'a ruvech ri Mateo 22:36-40.

¿Achique rubeyal richin nikak'alajirisaj chi nikajo' ri Ajaf y nikasamajij?

Tasiq'uij c'a ruvech ri Mateo 5:48.

¿La c'o modo richin nikaben tz'aket chupan ri kac'aslen k'ij k'ij? (¿La c'o modo nikatoj chijun ri lajujtakil? ¿La c'o modo richin nikatakej chi utzil ri uxlanibel k'ij? ¿La c'o modo richin nikachajij chironojel ri Ch'abel richin Etamabel?)

## **RI JESUS XUCHOJMIRISAJ PE RI KITZIJ K'ATAJ CHUVECH RE RUVACH'ULEF**

Ri Jesús xurayij chi conojel ri vinaki' ri e c'o chuvech re ruvach'ulef xquetamaj ri utzilej rutzijol. Roma c'ari', rija' xerucha' cablajuj apostoli' richin xquik'alajirisaj rija' chiquivech ri vinaki'. Jec'a rije' ri nabey tak yukenela' richin ri Ruk'ataj. Rije' xquic'ul pe riq'uin ri Jesús ri ruk'atbel tzij richin queri' xesamej pa rubi' rija'. Riq'uin c'a ri k'atbel tzij ri', rije' chuka' xquiben ronojel ri xquitz'et chi ri Jesús xuben. Ri e c'uluyon richin ri ruk'atbel tzij pa quik'a' ri apostoli' chuka' xetiquir xequitijoj, y xequikasaj chuxe' ya', y xequiben ch'aka' chic takbel pa rubi' rija'. Tok xcom ri Jesús, rije' c'a xquibanala' na ri rusamaj, c'a jampe ri vinek xe'oc itzel y xequicamisaj ri apostoli' chuka'.

¿Achique roma xerucha' ri Jesús ri cablajuj tak apostoli'?

Tasiq'uij c'a ruvech ri Marcos 3:14-15.

¿Achique roma xyatej chique ri apostoli' ri ruk'atbel tzij ri Jesucristo?

## **RI JESUS XOJRELESAJ PE CHUPAN RI KAMAC Y XOJRUCOL PE CHUVECH RI CAMIC**

Ri Jesús xerutijoj ri vinaki' y xeruturusaj. C'a c'ari', rija' xunuc' apon ri' richin xuben ri ruq'uisibel camelabel y xutoj ronojel ri quimac ri vinaki'. Xbitej can chi c'o chi xti-com rija' roma xtuk'alajirisaj chiquivech ri vinek chi ja rija' ri Ruc'ajol ri Dios. Jun ak'a' nabey chuvech ri k'ij richin ri rucamic ri Jesús, jari' tok rija' xbe pa jun cotz'ijbel rubini'an Getsemaní. Rija' xuque' ka chiri' y xch'o ak'anij riq'uin ri Tata'ixel. Man xyaloj ta richin xuchop rutijic janíla nim k'axon. Tok najin che ch'oven riq'uin ri Dios, ri Jesús xok'. Jun apóstol rubini'an Orson F. Whitney xutz'et chupan jun tz'etonic ri Colonel tok rija' najin chuc'ovisaxic ri k'axomal. Rija' xutz'et chi ri Ajaf xok' y quere' xubij ri apóstol ri': "Tok queri' xintz'et, xpax ri vánima y xinok' roma can xin-

joyovaj ruvech. Chijun c'a ri vánima xinya' riq'uin rija'. Xinvajo' rija' riq'uin ronojel ri vánima, y janíla xinrayij yibe ta riq'uin chuvech xabachique chic nurayibal. Ri Jesús "x-be apon juba' y xulucuba' ri rujolon c'a pan ulef. C'ari' xch'o riq'uin ri Tata'ixel y quere' xubij: Nata' vi tiquirel, nel ta el viq'uin re kumbel ya' re'. Y mani achi'el ri ninvajo' yin, ja ta ri achi'el navajo' rat'" (Mateo 26:39).

Chupan re ruq'uisibel tak k'ij re', ri Colonel xuk'alajirisaj pe ri nimalej k'axomal ri xutij rija'. Quere' c'a xubij: Ri pokonal ri' xuben chi yin Dios xibaybot roma yalan nuk'axomal. Y jac'a yin janíla in nim chiquivech conojel chic. Ri pokonal ri' xuben c'a chuve chi xel quic' chupan chiquijujunal nutz'okpinbal y xintij pokon richin uxlabel y richin ch'aculaj (DyC 19:18). Xe'ic'o chupan ri ruch'acul ri nimalej k'axomal richin ri c'ajisabel quichin checonojel ri mac ri e quibanon conojel ri vinaki'. Manek modo richin nik'ax ta chuvech manjun vinek ri nimalej k'axomal ri rejkan rija'. Manek chuka' modo richin manjun chic vinek xtucoch' ta ri nimalej k'axo'n richin ch'aculaj y richin uxlabel. Chupan ri momento ri' ri Cristo xeruch'ec conojel ri ruc'ayeval ri xeruya' ri Satanás chire. Ri ruk'axo'n ri xutij chuvech ri cruz man xic'o ta ruvi' nim chuvech ri k'axo'n ri xuc'ovisaj chiri' pa Getsemaní. Rija' xule' chuxe' ronojel. Riq'uin c'a-re', rija' noc ri rusakil ri kitzij chupan ronojel, chuka' chiquicojol ronojel (DyC 88:6).

Man riq'uin vi re', manjani titz'aket ri ruk'axomal. Pa ruca'n k'ij, ri vinek xquich'eyala' rija', y xquikasaj ri ruk'ij y xech'uban chirij. Rije' xquiben chi rija' xrejkej ri rucruz c'a pa ruvi' jun juyu'. C'ari' rije' xquiyec ak'anij rija' y xquibajij chuvech ri cruz ri'. Ri vinaki' xquic'ajisaj ruvech y xquisoc chiri' y can c'ayef vi rubaniquil ri pokon ri xutij. Tok rija' c'o chic chuvech ri cruz beleje' horas, quere' xusiq'uij ak'anij: "Dios vichin, Dios vichin, ¿achique roma xinamali can?" (Marcos 15:34). Chupan ri hora más c'ayef chire ri Jesús, ri Tata'ixel xrelesaj el riq'uin rija' ri ru espíritu. Jare' xuben ri Jesús richin queri' xtuc'ul chironojel ri c'ojlemal pa ruvi' ri mac y chuka' ri camic.

Tok ri Colonel retaman chic chi ri Tata'ixel ruc'ulun yan ri rucamelabel, jari' tok quere' xsiq'uin cof, y quere' xubij:

“Xc’achoj yan” (Juan 19:30). “Nata’, pan ak’a’ ninvukxanij vi ri nu espíritu” (Lucas 23:46). Xulucuba’ ruvi’, y xujech el ri ru espíritu. Caminek ri Colonel. C’a c’ari’, xbanatej jun nimalej silonel chuvehch re ruvach’ulef.

C’a c’ari’, cotz’ol ri ruch’acul oxí’ k’ij chupan jun jul. Ja c’ari’ tok ri ru espíritu ri Jesús xbe chiquitijoxic ri ch’aka’ chic espíritus ri nic’atzin chique ri utzilej rutzijol (tatz’eta’ c’a ri 1 Pedro 3:18-20). Pa rox k’ij, jari’ jun domingo, ri ru espíritu ri Jesús xoc pe chic chupan ri ruch’acul. Jac’a rija’ ri nabey vinek ri xuch’ec ka ri camic. Xk’ajer c’a ri lok’olej rutzijol ri nubij chi “nic’atzin na vi chi nic’astej chiquicojol ri caminaki” (Juan 20:9).

C’a oc ri’ xc’astej yan ri Jesús, xuk’alajirisaj pe ri’ chiquivech ri Nefi’i’ y xupaba’ ri ruk’ataj chiquicojol. Xerutijoj ri vinek y xeruturusaj. Ri xubanala’ chirí’ tz’ibatel can chupan ri 3 Nefi 11-28.

### **¿ACHIQUE ROMA NIC’ATZIN CHIKE ROJ RI RUC’ASLEN RI COLONEL**

Que c’are’ xubij can ri Jesús: “Manjun c’o ta más nim rajovabal que chuvehch ri’, chi jun xtuya’ ruc’aslen coma ri rachibil. Rix ix vachibil vi ye’iben ri yenpixabaj chive” (Juan 15:13-14). Riq’uin jun utzilej rurayibal, rija’ xuch’uch’ujirisaj ri’ y xuc’ovisaj ruc’ayeval chupan Getsemaní y chuka’ chuvehch ri cruz. Vi man nikanimaj ta rutzij rija’, manek rejkalen ri rucamic. Rija’ xaxe nuc’utuj chi titzolin na pe kac’u’x chupan ri kamac, y kojjel apon riq’uin, y tikajo’ rija’ riq’uin ronojel kac’u’x. Quere’ c’a xubij can: “Y can ja vi re’ ri utzilej nutzijol ri nuya’on can chive, chi yin in petenek chuvach’ulef chubanic ri rurayibal ri Nata’, roma ja rija’ takayon pe vichin. Ri Nata’ xirutek pe, richin chi xiyac c’a chuvehch ri cruz. C’ari’, tok in yacon chic chuvehch ri cruz, xenq’uen ta pe viq’uin conojel vinaki’. . . .xtik’at c’a tzij pa quivi’ chirij ri quibanobal, stape’ c’a e utz o e itzel. . . .Ri samaj itz’eton chi nubanon yin, ja c’ari’ ri xtiben rix chuka’. . . .Roma c’ari’, ¿achique c’a ruvehch achi’a’ ruc’amon chi yixoc rix? Can kitzij vi ninbij chive chi nic’atzin chi yixoc xa junan c’a viq’uin yin” (3 Nefi 27:13-27).

Tanojij c'a chi c'o jun nimalej ac'as y chi man yatiquir ta natoj. ¿La utz ta xtana', jun chic vinek xtutoj ta c'a ri c'as ri' pan abi' rat? Jari' junan riq'uin ri xuben ri Jesús koma roj.

Tabixaj ri bix rubini'an "Ri Ajaf Jesús Xc'astej Chic Vacami!" y chuka' ri bix rubini'an "Janila Jebel ri Ajovabel."

CH'AKA' CHIC MOCAJ RI UTZ YE'ANIC'OJ

2 Nefi 25:12 (ri Junayon Ruc'ajol ri Tata'ixel pa ch'acutaj)

Moisés 6:57 (ri Jesucristo ja rija' ri Junayon Ruc'ajol ri Dios)

Mateo, Marcos, Lucas, y Juan (ri ruc'aslen ri Jesucristo y ri rutijonic)

Mateo 10:1-8 y ri Lucas 9:1-2 (ri apostoli' xetak riq'uin ri cuchuk'a' y ri quik'atbel tzij)

Mateo 26,27,28 y ri Marcos 14,15 y chuka' ri Lucas 22,23 (ri Jesús pa Getsemani, nichapatej y nicamisex)